



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

19 Novembru 2018
Komunikadu Imprensa
Parlamentu Nasionál

Deputadu lejislatura dalimak Parlamentu Nasionál finalmente kria kultura foun kona-ba levantamentu imunidade ba deputadu sira atu kolabora ho tribunál

Iha Tersa-feira, 13 Novembru 2018, deputadu lejislatura dalimak Parlamentu Nasionál finalmente kria kultura foun kona-ba levantamentu imunidade iha Parlamentu Nasionál ba deputadu sira atu kolabora ho tribunál.

Parlamentu Nasionál liuhosi plenária halo levantamentu ba pedidu levantamentu imunidade hosi Tribunal Distritál Dili ba deputadu Mariano Assanami Sabino hanesan testamuña ba kazu krime partisipasaun ekonomika no krime falsifikasaun dokumentus no pedídu hosi Tribunál Distritál Baucau ba deputadu António da Conceição.

Rejultadu votasaun ba pedidú autórizasaun levantamentu imunidade ba deputadu Antonio da Conceição rezulta votu sira afavór 56, kontra 3 no abstensaun 1. Entertantu rejultadu votasaun ba deputadu Mariano Assanami Sabino ho votu; afavór 53, kontra 3 no abstensaun 4 hosi total deputadu nain 60 ne'ebé marka prezensa.

“Ida-ne'e pasu importante ne'ebé ita rejista hanesan progresu pozitivu ida iha períodu lejislatura dalimak nian tanba iha lejisltura anterior, liuliu iha lejislatura datoluk, prosesu sira relasiona ho levantamentu imunidade deputadu ka membru governu sira sai komplikadu no konfuzsaun boot tanba iha interpretasaun ne'ebé *ambigu* no inkonsistente” dehan Diretor Ezekutivu JSMP, Luis de Oliveira Sampaio.

JSMP kongratula vontade no progresu importante ida-ne'e tanba Parlamentu Nasionál loke pajina no istória foun kona-ba oinsá atu hasai imunidade deputadu

sira hodi kolabora ho justisa. Partikularmente JSMP hakarak kongratula deputadu nain rua hosi Partidu Demokrátiku (PD) ne'ebé ho sira nia konsensia polítiku husu ba PN atu halo levantamentu ba sira ninia imunidade no ba hatan iha tribunál.

JSMP hanoin katak deputadu nain rua ne'e manifesta pratika ida-ne'e esesionál tanba hatudu sira ninia responsabilidade no aten-brani atu enfrenta justisa. Nu'udar polítiku idealmente tenke iha kualidade ida-ne'e; kualidade atu asumi responsabilidade ba kuakler aktu politiku ne'ebé relasiona ho ezerseriu knaar nu'udar ema-polítiku. JSMP fiar katak tribunál mak fatin ida propriu no lejítimu atu avalia no halo justisa ba alegasaun hirak ne'e.

JSMP observa katak iha tinan barak nia laran imunidade sai hanesan obstakulu boot ba tribunál sira atu aselera prosesu ba kazu krimi sira ne'ebé envolve deputadu no membru governu sira ne'ebé alegadu ba krime ruma. Tendénsia ida-ne'e akontese tanba iha interpretasaun ámbigu, inkonsisntente no tendénsiozu kona-ba imunidade ne'ebé garante iha Konstituisaun no Rejimentu Interna Parlamentu Nasionál nian. Situasaun ne'e akontese tanba provizaun konstitusionál no legál sira husik hela konfuzaun no loke dalan ba interpretasaun oin-oin ne'ebé la klaru. Tanba ne'e JSMP rekomenda dalabarak ona iha okaziaun diferente oin-oin atu husu ba PN no ministériu relevante sira dezenvolve matadalan ba interpretasaun uniforma ida atu klarifika oinsá no iha situasaun saida de'it mak deputadu ka membru governu sira reklama atu uja sira ninia imunidade.

JSMP kontinua husu ba Parlamentu Nasionál hanesan órgaun ne'ebé iha komptensia atu halo levantamentu ba imunidade deputadu ka membru governu sira atu mantein no institucionaliza pratika di'ak ne'e iha futuru atu labele impede deputadu ka membru órgaun soberania sira nia prosesu bainhira tribunál hato'o pedídu ba parlamentu atu hasai sira nia imunidade.

Iha deklarasaun deputadu Assanami Afirma katak PD pronto kolabora ho justisa. Deputadu Assanami afirma katak kazu ne'e kleur loos ona dezde 2015 no nia julgamentu adía bebeik. Tanba ne'e, hanesan ministru iha momentu ne'ebá sei fó sásin iha tribunál atu evita ema seluk inventa iha públiku relasiona ho kazu ne'e.

Entertantu deputadu Antonio da Conceição haktuir katak nia kazu akontese iha 2014 liu ba iha postu Vemasse, Munisípiu Baucau relasiona ho ajudu umanitariu ba suku lima ne'ebé afetadu hosi tempu bailoron naruk. Prosesu ne'e rasik liuhosi deputadu sira iha PN ne'ebé ko'alia kona-ba situsaun iha momentu ne'ebá no

komunidade rasik hato'o karta iha momentu ne'ebá ba nia. Nia subliña katak nu'udar Ministru Industria no Komersiu presiza halo intervensaun umanitariu, la'os intervensaun merkadu no iha tempu ne'ebá iha duni foos ne'ebé disponivel atu halo atuasaun ida hanesan ne'e. Maibé depois nia tenke simu investigasaun, sai mós nu'udar arguidu nune'e nia husu ba Parlamentu Nasionál hodi halo levantamentu ba nia imunidade para bele koopera ho justisa atu hakotu kazu ne'e iha tribunál.

Iha parte seluk, Vise-Prezidenté Partidu Demokrátiku, Adriano do Nascimento hatete, PN hasai ona imunidade deputadu nain rua ne'ebé sai hanesan lideransa PD hodi ba kumpri justisa relasiona ho kazu balun ne'ebé mosu iha momentu sira nian governasaun.

Lideransa PD sira ne'e sai ona ezemplu ida ba partidu polítiku sira atu banati tuir, tanba konsidera katak imunidade ne'e la'os eziste para sempre maibé iha mós limitasaun rasik.

JSMP husu atu hametin pratika di'ak ida-ne'e, maibé mós rekomenda ba deputadu sira atu imunidade ne'ebé hasai tenke totál to'o konklui prosesu tomak iha tribunál hodi labele implika ba prosesu julamentu sira tuir mai.

Antes ne'e Tribunál Distritál Baucau apresenta pedidu ba Prezidente Parlamentu Nasionál atu husu deputadu António da Conceição hanesan eis-Ministru Komérsiu no Indústria atu presta deklarasaun iha julgamentu lora 14 Novembru 2018 ho kazu krimi partisipasaun ekonomia ho.kualidade hanesan arguidu.

Enkuantu ba kazu deputadu Mariano Assanami Sabino, Tribunal Distritál Dili apresenta pedidu ho númerú Prosesu : 0029/16.PGCCC atu presta deklarasaun ho kualidade hanesan testamuña ba kazu krime partisipasaun ekonómika, krime falsifikasaun dokumentus ka notasaun téknika ba fornimentu karau ne'ebé bele prodús susu been.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

www.jsmp.tl

Telephone:3323883